

La Befana de NOAL

Go proprio voja de dirve 'sta roba
Parchè so che voialtri no ghe badè
Anca se mi son vecia storta e goba:
da mile ani mi vegno e desso scoltè:
conosso tuti par nomi e cognomi!
De 'e volte confondo i camineti,
me fasso on fià de confusion co i doni,
magari scanbio siori co poareti,
portando ai primi na branca de carbon
e a st'altri 'na steca de mandolato.
Vorìa a tuti portarghe un ano bon,
un mondo gentile, in pase, educato.
'na speranza me preme pì de tute,
co vedo tristi e magri, stì museti,
de poderli nutrir tuti in salute
co mama insième e popà, benedeti!
Penseve quanto a caminar pa 'l mondo
ghe vol de forza, corajo e fadiga!
mi me toca ogni ano e ve rispondo
che la motoscoa me smonta a Pianiga.
Po', su e zò par case senpre pì alte,
busi de camini senpre pì streti,
co 'l capogiro a sbrissar so le malte
par portarve in tenpo i regaleti.
E ghe xè chi dise che mi so morta!
Eh no! jèro in ritardo drio la Brenta,
sto rivando, tegnì verta la porta!

Se qualcun almanco me desse 'na spenta
faria partir oncara la motoscoa:
son vecia sì, go le buganze ai piè,
rivar in tempo la xè 'na parola
però mi so da quanto che me spetè!

***Eviva la Befana
co 'l naso rosso
e calze de lana!***

***A chi dise che la xè morta
che ghe vegna la boca storta!***

***A chi pensa che no la xè vera,
mal de panza fin a sera!***

***A chi ghe crede e la varda in viso
basi tanti e on gran sorriso!***

Dino Libralato

Go inpissà de scondon,
pa no risciar 'na contravension,
on fogheto piccolo ma belo
che alsando fumo verso el cielo
me ga dà speranza pa 'l tempo
de 'a me sera,
pa lezar pronostego e lamento
al mejo che se spera!
Tenpo calmo e poco vento
spenze, la befana co la so scoa
che da Trieste gira e svola;
pol partire pi bonora
quela che vien da la Valsugana.

co on refolo de bora.
fin so 'l palco de la Pro Loco
la pi zovane Befana
on fià stravolta dal siroco
riva su da la padovana.
Riva tute senza farse male
torno la Roca de Noale,
pa' inviare 'na gran festa
ne la çità de i Tenpesta!